



PATNUBAY SA MISA



15 Abril 2018

Ika-3 Linggo ng Pasko ng Pagkabuhay

Taon B

Paglilininaw ng Lahat

*N*gayong ikatlong Linggo ng Abril, ikatlong Linggo ng Pasko ng Pagkabuhay, patuloy tayo sa pakikipagtagpo kay Kristong Nabuhay. Pinapayapa niya ang kalooban ng kanyang mga disipulo at iminumulat ang kanilang isipan upang ipaunawa ang mensahe ng Banal na Kasulatan tungkol sa kanyang kapalaran ng pighati at luwalhati.

Sa tanglaw lamang ng Muling Pagkabuhay natin napagwawari ang kahulugan ng marahas na pagdurusa at kamatayan ni Kristo. Gayon din, sa tanglaw ng kanyang muling pagkabuhay at buhay na walang hanggang tinamo niya para sa atin, natatanggap natin ang mga pag-subok sa buhay nang buong pananalig at hinahon.

Kay Kristong Nabuhay lamang lumilininaw ang lahat at napaglalaman natin ang maraming anyo ng kamatayang nagbabanta sa ating buhay. Sa Eukaristiyang ito, hilingin natin ang ibayong pananalig, hinahon, at lakas para sa ating sarili at lahat nating minamahal.



PASIMULA



Pambungad

(Ipahahayag lamang kung walang awiting nakahanda.)

Sa D'yos tayo ay magalak, lahat magpuri nang wagas. Sa ngalan n'ya'y ipahayag, pagpupuring walang kupas. Aleluyang walang wakas!

Pagbati

P— Ang biyaya ng ating Panginoong Hesukristo, ang pagmamahal ng Diyos Ama, at ang pakikiisa ng Espiritu Santo ay sumainyong lahat!

B— At sumaiyo rin!

Pagsisisi

P— Natitipon bilang mag-anak ng Diyos, may pakumbabang pananalig nating hilingin ang pagpapatawad ng Panginoon sa lahat nating mga kasalanan. *(Manahimik saglit.)*

P— Panginoong Hesus, ikaw ang Banal at Matuwid. Panginoon, kaawaan mo kami!

B— Panginoon, kaawaan mo kami!

P— Panginoong Hesus, ikaw ang May-akda ng Buhay. Kristo, kaawaan mo kami!

B— Kristo, kaawaan mo kami!

P— Panginoong Hesus, ikaw ang aming tagapamagitan sa Ama. Panginoon, kaawaan mo kami!

B— Panginoon, kaawaan mo kami!

P— Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B— Amen!

Papuri

B— Papuri sa Diyos sa kaitaasan at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbunyi ka namin, pinasasalamat ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sa-pagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P— Ama naming makapangyarihan, lagi nawang magalak ang iyong sambayanan sa pagkakaroon ng bagong kalooban upang sa kadakilaang dulot ng pag-anib sa iyong angkan, ang araw ng pagkabuhay ay maging pag-asa sa pagdiriwang, sa pamamagitan ni Hesukristo kasama ng Espiritu Santo magpasawalang hanggan.

B— Amen!

**PAGPAPAHAYAG NG
SALITA NG DIYOS**



Unang Pagbasa Gw 3:13-15.17-19
Si Hesukristong ipinako sa krus at muling nabuhay ang pinakabuod ng pangaral ng mga apostol. Makikita natin itong itinatatampok sa talumpati ni San Pedro, matapos niyang pagalingin ang isang lalaking lumpo mula nang isilang.

L- Pagpapahayag mula sa mga Gawa ng mga Apostol

Noong mga araw na iyon, sinabi ni Pedro sa mga tao: “Ang Diyos nina Abraham, Isaac at Jacob, ang Diyos ng ating mga ninuno, ang nagbigay ng pinakamataas na karangalan sa kanyang Lingkod na si Hesus. Ngunit siya’y ibinigay ninyo sa maykapangyarihan at itinakwil sa harapan ni Pilato, gayong ipinasiya na nitong palayain siya. Itinakwil ninyo ang Banal at Matuwid, at isang mamamatay-tao ang hiniling ninyong palayain. Pinatay ninyo ang Pinagmumulan ng buhay, ngunit siya’y muling binuhay ng Diyos, at saksi kami sa bagay na ito.

At ngayon, mga kapatid, batid kong hindi ninyo nalalaman ang inyong ginawa, gayong din ang inyong mga pinuno. Ngunit sa ginawa ninyo’y natupad ang malaon nang ipinahayag ng Diyos sa pamamagitan ng mga propeta na ang Kristo’y kailangang magbata.

Kaya’t magsisi kayo at magbalik-loob sa Diyos upang pawiin niya ang inyong mga kasalanan.”

Ang Salita ng Diyos!
B – Salamat sa Diyos!

Salmong Tugunan Awit 4
B – Poon, sa ‘mi’y pasikatin, liwanag sa iyong piling!

R. M. Velez

Chords: D, A/C#, Bm, D/A, G, A, D

Lyrics: Po-on, sa 'mi'y pa-si-ka-tin
li--wanag sa 'yong pi-ling!

* Sagutin mo ako sa aking pagtawag, Panginoong Diyos na aking kalasag; ikaw na humango sa dusa

ko’t hirap, ngayo’y pakinggan mo, sa aki’y mahabag. B.

* Nagagalit ka man, sala ay iwasan, sa loob ng silid ikaw ay magnilay; ihandog sa Poon, yaong wastong alay, ang pagtitiwala sa kanya ibigay. B.

* O Diyos, ang ligayang bigay mo sa akin, higit na di hamak sa galak na angkin, nilang may maraming imbak na pagkain at iniingatang alak na inumin. B.

* Sa aking paghimlay, ako’y mapayapa, pagkat ikaw, Poon, ang nangangalaga. B.

Ikalawang Pagbasa 1 Jn 2:1-5
Ipinaaalaala sa atin ni Juang ang ating kaligtasan ay nagmumula kay Hesus at ang pagkilala at pag-ibig sa Diyos ay di lamang pang-isip at dam-damin. Bagkus, ito’y higit sa lahat, pagsunod sa Kanyang mga kautusan.

L- Pagpapahayag mula sa Unang Sulat ni Apostol San Juan

Mga anak, isinusulat ko ito sa inyo para hindi kayo magkasala. Ngunit kung magkasala ang sinuman, may Tagapamagitan tayo sa Ama. At iya’y si Hesukristo, ang walang sala. Sapagkat si Kristo ang handog sa ikapagpapatawad ng mga kasalanan natin, at kasalanan din ng lahat ng tao.

Nakatitiyak tayong nakikilala natin ang Diyos kung sinusunod natin ang kanyang mga utos. Ang nagsasabing, “Nakikilala ko siya,” ngunit sumusuway naman sa kanyang mga utos ay sinungaling, at wala sa kanya ang katotohanan. Ngunit ang tumutupad sa salita ng Diyos ay umibig sa kanya nang wagas. Ganito natin nalalamang tayo’y nasa kanya.

Ang Salita ng Diyos!
B – Salamat sa Diyos!

Aleluya Lu 24:32

B – Aleluya! Aleluya!
Poong Hesus, aming hiling Kasulata’y liwanagin, kami ngayo’y pag-alabin.
Aleluya! Aleluya!

Mabuting Balita Lu 24:35-48
Matapos mapaliwanagan ang dalawang disipulo ng Emaus, nagpakita si Kristong Muling Nabuhay sa iba pa niyang mga disipulo sa Jerusalem. Ginawa

niya ito upang tibayan ang kanilang pananampalataya sa kanyang muling pagkabuhay at tulungan silang maunawaan ang Banal na Kasulatan tungkol sa kanya.

P- Ang Mabuting Balita ng Panginoon ayon kay San Lucas
B – Papuri sa iyo, Panginoon!

Noong panahong iyon: Samantalang pinag-uusapan ng mga alagad kung paanong nakilala si Hesus sa paghahati-hati ng tinapay, si Hesus ay tumayo sa gitna nila. “Sumainyo ang kapayapaan!” sabi niya sa kanila. Ngunit nagulat sila at natakot sapagkat akala nila’y multo ang nasa harapan nila. Kaya’t sinabi ni Hesus sa kanila, “Ano’t kayo’y nagugulumihanan? Bakit nag-aalinlangan pa kayo? Tingnan ninyo ang aking kamay at paa, ako nga ito. Hipuin ninyo ako at pagmasdan. Ang multo’y walang laman at buto, ngunit ako’y mayron, tulad ng nakikita ninyo.” At pagkasabi nito, ipinakita niya sa kanila ang kanyang mga kamay at mga paa. Nang hindi pa rin sila makapaniwala dahil sa malaking galak at pagkamangha, tinanong sila ni Hesus, “May makakain ba riyan?” Siya’y binigyan nila ng kaputol na isdang inihaw; kinuha niya ito at kinain sa harapan nila.

Pagkatapos, sinabi sa mga alagad, “Ito ang tinutukoy ko nang sabihin ko sa inyo noong kasama-sama pa ninyo ako: dapat matupad ang lahat ng nasusulat tungkol sa akin sa Kautusan ni Moises, sa mga aklat ng mga propeta at sa aklat ng mga Awit.” At binuksan niya ang kanilang mga pag-iisip upang maunawaan nila ang mga Kasulatan. Sinabi niya sa kanila, “Ganito ang nasusulat: kinakailangang magbata ng hirap at mamatay ang Mesiyas at muling mabuhay sa ikatlong araw. Sa kanyang pangalan, ang pagsisisi at kapatawaran ng mga kasalanan ay dapat ipangaral sa lahat ng bansa, magmula sa Jerusalem. Kayo ang mga saksi sa mga bagay na ito.”

Ang Mabuting Balita ng Panginoon!
B – Pinupuri ka namin, Panginoong Hesukristo!

Homiliya

Sumasampalataya

B – Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P –Buong buhay nati’y dapat magpatotoo sa katunayang tayo’y iniligtas ng kamatayan at muling pagkabuhay ni Hesus. Pagkat batid natin ang kakapusan natin dito, manalangin tayo:

B –Panginoon, dinggin mo kami!

* Nawa ang buong Simbahan, sa pamamatnubay ng kanyang mga pinuno, ay huwag tamlayan sa pagpapahayag ng Muling Pagkabuhay at magpatotoo rito. Manalangin tayo! **B.**

* Nawa ang mga nagdurusa ay makatagpo sa muling pagkabuhay ni Kristo ng tiyak na bukal ng kasiyahan at pag-asa. Manalangin tayo! **B.**

* Nawa ang mga nag-aalinlangan sa muling pagkabuhay ni Kristo ay matulungang manalig ng mabuting pamumuhay ng lahat ng sumasampalataya. Manalangin tayo! **B.**

* Nawa lahat ng naging biktima ng mga natural na pananalanta at karahasan ng tao ay makalaspag matibay na pagtulong ng lahat ng nananalig sa muling pagkabuhay ni Kristo. Manalangin tayo! **B.**

* Nawa lahat tayong natitipon dito upang ipagdiwang ang muling pagkabuhay ng ating Panginoon ay makalaspag ng nagbibigay-

buhay na kapangyarihan nito sa ating pang-araw-araw na gawain. Manalangin tayo! **B.**

* Tahimik nating ipanalangin ang ating mga pansariling kahalilingan. (*Tumigil saglit.*)

Manalangin tayo! **B.**

P –Hesus, tulungan mo kaming paglabanan ang nakamamatay na bisa ng aming pagkamakasalanan at maging tanda ng iyong muling pagkabuhay sa lahat naming mga kapatid. Ikaw na nabubuhay at naghahari magpakailanman.

B –Amen!



P –Manalangin kayo . . .

B –Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P –Ama naming Lumikha, tanggapin mo ang mga alay ng iyong sambayanang natutuwa. Ang pagkabuhay ng iyong Anak na niloob mong aming ikatuwa ngayon ay papagbungahin mo ng galak na mananatili sa amin habang panahon, sa pamamagitan niya kasama ng Espiritu Santo magpasawalang hanggan.

B –Amen!

Prepasyo ng Pagkabuhay V

P –Ama naming makapangyarihan, tunay ngang marapat na ikaw ay aming pasalamatan.

Ikaw ang lumikha sa tanan. Ikaw ang nagtakdang magkaroon ng gabi at araw, gayundin ng tag-init at tag-ulan. Ikaw ang humubog sa tao bilang iyong kawangis na mapagkatiwalaang mangasiwa sa daigdig. Ikaw ngayo’y pinaglilingkuran sa pagganap sa pananagutan ng iyong pinagtitiwalaan sa pamamagitan ng Anak mong mahal.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami’y nagbubunyi sa iyong kadakilaan: **B** –Santo, santo, santo . . .

Pagbubunyi

B –Sa krus mo at pagkabuhay

kami’y natubos mong tunay, Poong Hesus naming mahal, iligtas mo kaming tanan ngayon at magpakailanman.



B –Ama namin . . .

P –Hinihiling namin . . .

B –Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B –Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

Paanyaya sa Pakikinaabang

P –Ito ang Kordero ng Diyos, ang Banal at Matuwid, na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B –Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinaabang

(Ipahahayag lamang kung walang awiting nakahanda.)

Kailangang pagtiisan ni Kristo ang kahirapan saka dapat na mabuhay, nang patawad ay makamtan. Aleluya, s’ya’y awitan!

Panalangin Pagkapakinabang

P –Ama naming mapagmahal, tunguhan mo at lingapin ang iyong sambayanan na minarapat mong makinabang sa piging na pangmagpakailanman. Ipagkaloob mong kami’y maluwalhatang makarating sa pagkabuhay na magtatampok sa amin sa iyo ng piling, sa pamamagitan ni Hesus-kristo kasama ng Espiritu Santo magpasawalang hanggan.

B –Amen!



P –Sumainyo ang Panginoon.

B –At sumaiyo rin!

P—Magsiyuko kayo at ipanalangin ang pagpapala ng Diyos. (*Manahimik saglit.*)

Pinagkalooban kayo ng Manunubos ng ganap na kalayaan. Magtamo nawa kayo ng kanyang buhay na walang hanggan.

B—Amen!

P—Sa pananampalataya nabuhay kayong kasama ni Hesus sa bautismo. Maging banal nawa ang inyong buhay upang

makasama niya kayo magpakailanman.

B—Amen!

P—Nagpakita si Hesus sa kanyang mga disipulo upang tibayan ang kanilang pananampalataya. Tibayan nawa niya ang inyong pananampalataya upang magpatotoo kayo sa kanyang muling pagkabuhay sa inyong pang-araw-araw na buhay.

B—Amen!

P—Pagpalain nawa kayo ng makapangyarihang Diyos: Ama, Anak, at Espiritu Santo.

B—Amen!

P—Tapos na ang Misa. Humayo kayo at ibahagi ang kagalakan ni Kristong Nabuhay sa lahat ninyong makatagpo ngayon.

B—Salamat sa Diyos!



Sa Tanglaw ng Salita ng Diyos

Batid ng lahat ng debotong Judyo, pati na ng mga disipulo ni Kristo, ang nilalaman ng mga Banal na Kasulatan. Ngunit bagamat alam nila ang mga propesiya tungkol sa Mesiyas, di nila nauawaan ang mahalagang mensahe nito. Para sa kanila, ang Banal na Kasulatan ay isang nakabilot na kasulatan; tulad ng isang iningatang kabanngyaman. Waring “nalalambungan” ang kanilang mga puso’t isipan (*sangguniin 2 Cor 3:14*).

Kinailangan ang mga paliwanag sa kanila ni Kristong Nabuhay para maunawaan ng mga disipulong lahat ng nangyari kay Hesus ay alang-alang sa katuparan ng mga pahayag ng mga propeta (*sangguniin Lu 24:44*). Saka lamang nabuksan sa wakas ang kanilang mga isipan (*sangguniin Lu 24:45*), nag-alab ang kanilang mga puso (*sangguniin Lu 24:32*) at napuspos ng galak (*sangguniin Jn 20:20*). Naunawaan nilang ang buong Banal na Kasulatan ay tungkol sa misteryo ni Kristo. Di isang aksidente ang kanyang pagkamatay, kundi isang malayang pag-aalay para sa kaligtasan ng lahat ng tao (*sangguniin 1 Jn 2:2*). Iyon ay bahagi ng plano ng Diyos (*sangguniin Gw 2:23*). Gayundin, ang kanyang muling pagkabuhay ay hindi banal na likhang-isip lamang, kundi dakilang gawa ng Diyos, ang tampok na katuparan ng lahat ng propesiya (*sangguniin Gw 2:24-31*).

Mula na noon, lalo na pagkaakyat ni Hesus sa langit, ang Banal na Kasulatan ay naging patuloy na alaala para sa mga mananampalataya sa ipinako sa krus at muling nabuhay na Panginoon,



at natatanging “lugar” na kanilang katatagpuan sa kanya. Sa pagbasanito, mapagtatanto nila ang katapatan ng Diyos sa Kanyang mga pangako, at minsan pang madarama ang presensiya ni Kristong niluwalhati sa piling nila tulad nang panahong kasunod ng Muling Pagkabuhay.

Gayon din dapat para sa atin at para sa lahat ng henerasyon ng mga mananampalataya. Batid nating makakatagpo natin ang nabuhay na Panginoon sa maraming paraan, lalo na sa

mga sakramento, at lalung-lalo na sa Eukaristiya. Gayundin, makakatagpo natin siya sa mgabanal na Kasulatan. Ang mga ito ay di lamang mga hamak na aklat tungkol kay Hesus. **Ang mensaheng taglay rito ay ang Salita ng Diyos.** Nariyan si Kristo sa mga pahinangbunga ng inspirasyon at taglay nito ang kanyang kapangyarihang nagbibigay-buhay (*sangguniin Sacrosanctum Concilium 7*). Malalasap natin ang kanyang presensiya di lamang kapag ipinahahayag ang Banal na Kasulatan sa liturhiya, kundi kapag binabasa rin natin ito sa bahay kasama ng mga kapamilya, o sarilinan man. Ang mahalaga’y isang kababaang-loob, madasaling pusong bukas sa pagtanggap sa Salita, unawain ito sa tanglaw ng turo ng Simbahan, at ilapat ito sa ating pamumuhay sa tulong ng Espiritu Santo.

Sa gayon, bawat araw ay maaaring maging Pasko ng Pagkabuhay. Saka natin maliliwanagan ang lahat ng nangyayari sa atin at sa paligid natin, pagkat ang lahat ay makikita sa tanglaw ng Salita ng Diyos.



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org, wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, G. Ramos, V. David, J. Domingo, A. Adsuaara, D. Daguió

• Illustrations: A. Sarmiento, B. Cleofe • Marketing: Fr. B. Nolasco and T. Mojica • Circulation: R. Saldúa